

ATANGUYAN NAENAKHUGIN OKAOHEN

Ikalulikiyin Takyumeotaniklo Kanatami (DFO-kun) ihivgeokhimayan tukhiktun, ilaoyulo makpigan naonaeyaetilologo hivunikhiyutikhanun ilageagutin, tuniyaohimayun Nunavumi Imalikiyinun Katimayinun (NWB-kun) Miramar-kunin Kapihiliktumi Oyagakheoktinin (MHBL-kun, ihumagivlogilo iniktigeakaktun havaan avataoyumik ilitokhaetilogin okaotaoyukhan maligoagakhanik ihoakhaelikata. Taemaetologo, piyutaoyok ukuniga okaohiknik ihumakhakheogutikhaenik NWB-kun pikageagani Okaohiyeoyun iliyaohimayun NWB-kun nalaktitigeaktinagin katimanikmi ihumaleogutini unipkagini.

Kanoginigin Akitunigilo Akileotikhan Hivoagun

DFO-kun pihimalikmata akileotikhanik hivoagun hanalikata oyagaloknik iloegaelikata haneani tulaktakvikham hinani, oalikheani tulaktakveom. Akitunigin akileotaoyun 67-taosan 6-hanat 8-talaoyok ima titikiyutinun atukeotaovloni.

Akileotaoyukhan hivoagun titikatigun atukeotaoyagani piyageakakmiyok oyagakheoktinin, hananeaknikata monagilogolo ikalukan nunagiyaenik Doris-mi Tahikmi malgukni nunakni hananeaknikatalo monagilogilo tunungani ikalukan nunagiyaenik atagukveoyum, tuniyaogeaktinago *Ikalulikinikun Maligakyoami* ilagani 35(2)-metok agigutaoyuk. Ataohik ikalugakaktukhak tununganeneaktok Doris Lake-guyum kagikhukmi haneani Atagukveoyum Tatim Kukveani aepataok ikalugakaktukhak Doris Lake-mi haneani kagikhum Ogama Lake-min.

Atugeagani ikalukaktok Tail Lake Atagukveoyagani (TIA-guyok) nutaguktigiyutaoyageakaktok Havivaloknik Oyagakheoknikun Atakunun Maligoagakhanik (MMER-guyok). Ukoa maligoagakhan ihoakhakhimayun Ilagagun 36(5)metukun *Ikalulikinikun Maligakyoami* kanoginikhaeniklo kitun ataguligagata ikalukayuktunun imaknun agitilaganik uvani havivaloknik oyagakheoknikun ataguvaktun Ilagagun MMER-m, atagukveoyumayok ihoakhaktaoneaknikan manikami ikalukayuktuni, imaoyok okaotaoyok ilaoyageakakman Naonaepkutini II-mi maligoagakhani atagukveoligeaktinagu. Una piyutaoyok nutaguktigiyutaokman maligoagakhani agiktaoyageakakhunilo Atanikpakyoamin Katimayeni Kanatami (GiC-min).

Maligoagakhatigun nutaguktigutikhan MMER-mi havagiyaolaktun iniktakata avataoyumik ilitokhaenik Ikalulikiyilo Takyumeotaniklo Kanatami kaoyimalikata aktokniginik ikaloen nunagiyaenik namaknikatak ihoakhiyutikhakalikatalo akileotikhaniklunen himaotikhanik. Ukoa inikhimalikata, Avatilikiyin Kanatami (EC-kun) ihoakhaelaktun Maligoagakhalikiyinin Aktoknigagun Ilitokhaenikun Okaohik (RIAS-guyok) ataotikulo tuniyaoloni GiC-kunun ihumaleogutigiyakhan. Iniktakman avatilikinikun ilitokhaenik Doris North-mi Havamik, DFO-kun titigakhimayun Avatilikiyunun Kanatami December-mi 2006-mi, havagiligeagani nutaguktiknigagun maligoagakhan.

Piyageakakman Havivaloknik Oyagakheoknikun Atakunun Maligoagakhani (MMER-mi) hivoagun maniknik akileotikhanik, titikiyutaoloni atukeotaoyagani, oyagakheoktinin ikaloen nunagiyaen himaotikhanik akileotikhakakneakmaga atoktaoneaknikan Tail Lake Atagukveoloni Taheoyok. DFO-kun pikuneakaen MHBL-kun kanok akitunikakneakmaga akileotaoneaktok hanalikata monagiyaganilo ikaloen nunagiyaenun himaotikhak ikalugakakveoneaktuniklo Doris Lake-mi (hitamani nunani); ahivaknigin ikaloknun haputaoyunik Roberts Lake-mi kukveani; ihoakhivaaligeaganilo kukni ikalokaknigin E09-mi Roberts Lake-mi.

Hanalikata

Tulaktakvikhak Roberts Bay-mi: DFO-kun kaoyimayun NWB-kun pilakmata ihumaleogutikhaenik atulikuyamikniklo kavamani havakveoyunin ukununa takyumetunik, havagiyaoloaktunik Roberts Bay-mi (takyume avataoyok). DFO-kun agikhimayan Aneaknaktugugitagani, Ihoeliyutaoyulo Ahiguktigiyutaoyulo (HADD-kun) ikaloen nunagiyaenik piyutaoyunik tulaktakvikhak hanayaokpan July-mi 2007-mi. MHBL-kun inikhimaliktan tungaviloakhan tulaktakveom hivoani pikoegiyutagun ikalulikiyin havagini.

Kayakaktun Tikmean Kaenalo Tunmigakhak: Kayakaktun tikmean kaenalo tunmigakhak puktalaktok, kagikhunoami Doris Lake-mi hivugata kivalikhinoagani oyakikivikham. Tunmigak iviktenageaktok, 25-metamik takinikaktok 4-mitamiklo hilikniga, siksini ipikvikakneakhuni. Kayakaktun tikmean kaenalo tunmigakhan ahivaktaoneaktok siksilo ipikven oyagakheoktakata taemakata. DFO-kun ihumayun MHBL-kun ihoahivaligutikhanik pihimalikmata ihoeliyutaogitagani ikaloknun nunagiyaenulo havanigagun, atoknigagulo ahivaknigagulo tunmigak Doris Lake-mi.

Doris Creek-mi Ikagun: Ikageagutikhakneaktok Doris Creek-mi ihoakutaoyagani Atagukvikmun apkutaoneaktok. Kukmi huliyageakagitun hananigagun. DFO-kun ihumayun MHBL-kun pihimakmata ihoakutikhanik ihoeliyutaogitagani ikaloknun nunagiyaenulo uvuna Doris Creek-mi Tunmigaoyukun kanogitunikhagulo.

Imaknik Atoknigin

Imiktakvikhak: Imiktakvikhak Doris Lake-mi oeguneaktok puktalaktimik papaotikakvikmun aktugitagani natka tatim. Hananiga, atoknigalo ahivaknigalo imiktakveom ihoeliyutilimagitok ikaloknun nunagiyaenulo Doris Lake-mi, ukoa atugumayaen ihoakhivaligutikhan atoknikata.

Atagukvikhak Uyakikivikmin

Piyutikaktologo imagiknigagun maligatigulo atugeakaktunik MMER-mi, DFO-kun kanogililimagitun EC-kun atulikuyaenik atagukvikun oyakikivikmin (TIA-kun) Tail Lake-mi ahenilo imavaloen imagiknetigun Doris North-mi Havaakhakun.

Ikaloen nunagiyaelo ihumagivlogin atoknigagun Tail Lake TIA-khamik, MHBL-kun atugumakmata akileotaoyukhanik ikaloen nunaektaokpata ukuniga ikalugakakvikhanik Doris Lake-mi (hitamani inikhani), ahivaknigagulo ikaloen ayokhaotigiyan Roberts Lake-mi kuganin, ihoakhivaligeagani kuganoak ikalokaktok Tributary E09-mi ilagani Roberts Lake. Atukan ilagani 27.1-guyok MMER-mi, Hunalika Aheogitagani Paknaeyaon tuniyaoyageakakman agiktaolonilo DFO-kunin atagugeaktinagin halumaelguvaloknik atagukvikmun ilaohimayunik Atugeakaktuni 2-mi. DFO-kun atukuyaen MHBL-kun piyagani Hunalika Aheogitagani Paknaeyaon September 15, 2007-tikitpan ilitokhaktaoyagan agiktaoyaganilo.

Tail Lake-min Kukniga: Hananiga tunuhikheani atagukveom imaeyaknigalo Tail Lake-min kukniga ihoeliyutaoneakman, aheagukliklonilo, ahiguknigagulunen (HADD-guyum) ikaloen nunagiyaenik. HADD-guyum aheagulimiginikan Agigutaoyun tuniyaohimagitun nakuyun ihoahivaligutikhan pilgaktinagin akileotikhalo nunan aheonikata atukaktinagilo oyagakheoktinin. MHBL-kun atugumakmata malguknik ihoakhaeyagani ikalugakakvikhaknik Doris Lake-mi himaotaoyagani aheonikata ikalunoen Tail Lake-mi kuganin. DFO-kun atukoeyun MHBL-kunin tamatkeomayumik Aheoyukagitagani Paknaeyaonmik DFO-kunun September 15, 2007-tikitpan ilitokhaktaoyagani agiktaoyaganilo.

Ikaloeageagani Havaak: Havaan hulilugagutilunen ikalukaktuni imavalokni ahiguktigutaolakmata ikaloknik taemaetologo, havaakageakaktun ahinugaktigeagani ileogaeyaganiluen ikaloknik piyageakaligagani hanaligeaktinagin. MHBL-kun tunihiyageakaktun DFO-kunun nutamik ikaloeyageagani piyutikhanik ihoakhiteakhimayumik atugeagani Doris North-mi Havami agikhimakmatalo tuhakvigiyagani nunaliknetun ihumagiyaenik atoknigagun ikaluvaloen ahivaktaonikata tatinin aktoktaoyunin.

Monagiyutin

Pikageakaktok uvuna MMER-kun Avataoyumik Aktoknigagun Monagiyutikhanik (EEM-mik) havaamik ihoakhageagani, naonaepkutaoyaganilo aktoknigilaktaenik halumaelguvaloen ikaloknun, ikaloelo nikaenun umayuvaloknulo imakmi maligoaklogin pikageakaknigin pivikhakveoyunilo okaotaoyunik Naonaepkutini 5-mi MMER-mi. Ilalo, monagiyagani ikaloen nunagiyaenik himaotikhanik aolanigagun Roberts Lake-mi kugani, Tributary E09-milo Roberts Lake-mi, Doris Lake-milo piyageakakneakmata MMER-m ilagani. Ilagani *Ikalulikinikun Maligakyaom* agigutin, maligoateaknigalo nakuteaknigilo monagiyutin piyageakakmikmata ikaloen nunagiyaenun himaotikhanik aolanigagun Roberts Bay-mi malguknilo nunaoyukni Doris Lake-mi.

Taemakata Utikivageaganilo Nunan Ilitkuhenun

MHBL-kun ahivagumayan kayakaktun tikmean kaenalo tunmigakhan siksilo ipikven oyagakheokvik tamaktaokpan DFO-kun atulikuyaetigun. Ilagalo MHBL-kun ahivagumakmagin tamaeta imakmi napayun imiktakvikmi, utiktivaklogolo kagikhok Roberts Bay-mi imaektitpakviganun, halumaktiknigagulo utiktitaganilo ilitkuheanun Tail Lake kukvealo agiptiknigagulo tununikhea atagukvikmi himiktutaoyum. DFO-kun pikoeyun MHBL-kunik tunihiyagani naonaeteakhimayunik paknaeyaotini September 15, 2007-tikitpan, kuktitpaleanigagun tunungani himiktutaoyok aktoknikakneaknikan ihoeliyutaoneaknikalo ikaloknun nunagiyaenulo pikageagani ihoakhaotikhanik.

Iniktigutin

Tamaeni, avataoyumik ilitokhakniga maligoagakhaniklo pivaleanigagun naonaegutaokman aktokniginik ikaloknik nunagiyaeniklo. DFO-kun naamagenaktaen ihoakhaotikhan okaotaoyun NWB-kunun tuniyaohimayumi, ilageagutilo atulikuyavun, ihoakhiyutaokmata ihumalutaoyunun. Ilagalo, DFO-kun naluheoktun Aheoyukagitagani Paknaeyaon ihoakhiyutaoneakman ikaloen nunaginaenun aheokpata ima ihoakhateaknigagun ikaloen nunagiyaen aheogitagani ikalukaenageagani havamin aktoktaoyun imavaloen. DFO-kun Ilaoyumaenakmata NWB-kun Kigulikmi Tuhaktitiyutani Katimanikmi NWB-kulo ihumagiyaenun atulikuyavun mikinikhaoyagani aktoknigin ikaloknun nunagiyaenulo.